



20. oktoberi 2016

UKA2016/79

**Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut 2017-imi upernaakkut ataatsimiinnerannut atatillugu ukiunut sisamanut misileraataasumik aaqqississuussineq, nammineq inigisap aserfallatsaalineqarneranut imaluunniit nukimmik sipaarnerunissamut sanasunik suliaqartitsinermut atatillugu aningaasartuutit katillugit 20.000,00 kr inummut ataatsimut akileraarutigut ilanngaatigineqarsinnaalernissaanik suliaqassasut. Ukiut misileraataaffiusut tamarmik ukiumut 3.000.000 kr-nik aningaasanut inatsisitimmi illikartitsiviusaaq. Ukiut sisamat misileraataaffiusut ingerlareerpata misileraaneq nalilersuiffigineqassaaq.**

(Inatsisartunut ilaasortaq Steen Lynge, Atassut

Inatsisartunut ilaasortaq Steen Lynge Atassut, Inatsisartut aalajangiiffigisassamik siunnersuuteqarluni, tassalu nammineq inigisap aserfallaatsaalineqarneranut tunngasumik.

Nunatsinni angerlarsimaffippassuit aserfallassimasut aammalu ilaatigut najorneqarsinnaanngitsut isikkullit inigineqartut amerlaqaat pitsaangorsarneqarnissaallu pisariaqartinneqaqaluni.

Illoqarfiit isorliunerusut nunaqarfiillu qiviaraanni illunik nutaaliorderit aserfallaatsaaliinerillu unilluinnagajassimapput, sumiiffiilli ilaani unilluinnarsimallutik. Tamannalu soorunami ilungersunarpoq peqqinnartunik ullutsinnullu naleqquttunik ineqarnissarput eqqarsaatigalugu.

Pinngortitami nukissiutinik mingutitsisunik atuinerput millisarneqassappat taava illut oqortut aammalu kiassarneqarnerini atuinikitsut atonerulissagigut anguniagaasoq isumaqatigilluinnarparput.

Tassami issittumiippugut sapinngisamillu oqortunik nukissiutinik atuinikitsunik angerlarsimaffeqarnissarput pingaartorujussuusoq tamatta ilisimagatsigu.

Akileraartarnikkut illunik pitsanngorsaanissaq eqqarsaatigalugu suut iluaqutaassanersut nalilersortariaqarpagut.

Tassami assersuutigalugu sulisartut utoqqaat piniartullu illuminnik iluarsaassinermik ingerlataqartitsissagunik aningaasarpaalunnik peqaqqaartariaqartut takusinnaavarput.

Illutilinnullu tamakkiisumik ikiorsiinissaq anguneqassappat ilimaginngilarput akileraarutinik ilanngaassinnarluni tamanna illunik pitsanngorsaanissaq tamakkiisumik anguneqarsinnaasoq.

Nalunngilarput aningaaseriviit allallu illoqarnermut pitsanngorsaanissamut tungasunik attartorniaraanni sinerissami najugaqaraanni qanoq ajornartigisoq ilaatigullu periarfissaqanngivittarluni.

Uanilu siunnersuummi ikiorneqartussat tassaassapput inuit peqareersut aamma tamanna ajorinngilarput, kisianniliuna aasiit kingumut naligiinngitsumik aaqqissuussinissaq apeqquuseripput.

Illoqarnermut pitsanngorsaanissamut amerlanerpaat peqataassappata aamma aningaasatigut atorniarsinnaanermut tunngasut nunap sinneranut najugaqartunut periarfissaalernissaat ilungersuukkaanni kinguneqarnerulluassasoq takusinnaavarput.

Nunaqarfinni illoqarfinnilu minnerusuni namminneq illutaarsinnaaneq ullumikkut atuutunik pitsaanerusemik ingerlanneqarsinnaasoq suliarisariaqarparput. Aningaasanik attartorsinnaanerit nalunngilarput illoqarfiit Nuuk Sisimiut Ilulissat Qaqortullu avataani najugaqaraanni periarfissaqanngitsoq.

Taamaattumik ilaqutariit pitsaasunik najugaqarnissaanik kissaatigisaqarutta aamma sinerissami sulissuteqartariaqarpugut pisinnaatitaaffigaarpummi tamatta angerlarsimaffeqarnissarput.

Taamaattumik siunnersuuteqartup tunngavilersutai ilanngullugit Naalakkersuisut allanngutissatut siunnersuutaat isumaqatigalugu ataatsimiititaliami suliarineqarnissaa taperserparput.

Hans Enoksen